

四庫全書

集部

欽定四庫全書

集部

樂全集卷二十四

詳校官庶吉士_臣龍廷槐

檢討_臣何思鈞覆勘

總校官中書_臣朱 鈐

校對官中書_臣吳 俊

謄錄監生_臣羅翹遠

欽定四庫全書

樂全集卷三十四

宋 張方平 撰

雜著

先帝經疏文

右伏以聖神示化弃黃屋以上賓凡庶何知抱烏號而
永慕不有崇薦曷神悃誠願依妙湛之尊特開清淨之
供庶緣法力仰導真游伏願永證佛乘圓成道果儲神
無極逍遙梵釋之間卜世愈延跨越商周之表至於含

識普暢大和

四箴

并序及進狀

右臣猥以謏材忝職文館因覩秘閣曝諸圖書內有太宗皇帝御書一函臣竊發一軸觀之字為行書乃曲禮首篇四句教不可長欲不可縱志不可滿樂不可極深惟太宗皇帝英釁多材自天攸縱萬幾之暇秘殿閒燕移聲伎觀游之樂於經籍文史之間下筆習書意存勸戒昔漢諸儒集禮記諸善言而於首篇著茲四事蓋以

為人君保邦制理之道所宜深戒者故太宗思而形於
翰墨先帝緘而置諸秘府是將以嘉言善訓貽為孫謨
又豈惟筆精墨妙之云爾乎臣待罪諫垣覩事有發輒
廣其義述為四箴誠不足以勒盤孟汙屏床儻宣室聽
決之暇一賜開覽法宮衡石之上獲預親程亦庶乎備
晏居之誦代倚几之訓也干冒天聰臣無任戰慄之至
其所著四箴別為一軸謹隨狀上獻謹奏康定二年七
月

臣聞惟天生民有欲無主乃亂惟天生聰明時又故王者奉若天命以臨萬方慎乃迪德無時怠豫以義制事以禮制心以輯寧邦家用咸和萬民于後佚王罔自抑畏罔顧謫天之明命以若先民攸訓不迪率典德用弗類故人君保邦制理之道慎厥身修思永茲惟艱哉禮有之曰教不可長欲不可縱志不可滿樂不可極慎厥身之道茲四言者可謂切至矣書載周公無逸之篇曰在昔商王中宗治民祇懼不敢荒寧厥享國七十有五

年至于高宗嘉靖商邦能惠保于庶民厥享國五十有九年至周文王能知稼穡之艱難不淫于觀于逸于遊以庶邦惟正之供厥享國五十年則夫四者之不戒非惟德義之不則至于康養體志永綏萬壽亦莫之有益也蓋聖人所理有本末所顧有重輕身者當理之本位者可顧之重安其身然後能保其位能保其位然後能得其志欲而享天下之樂彼商之中高爰暨文王先憂勤後樂欲而宜民宜人受祿于天由審是道也陛下濬

哲文明徽柔惇懿慎諸事事之微念乎安安之難修其
可願罔或過舉茲甚盛德也已然古之明聖無忘交儆
盤庚曰無敢伏小人之攸箴臣以孤微職在規諫因覩
太宗御書竊有所發輒廣其意而獻箴云

教箴

惟皇至尊在上巍巍天日之高雷霆之威匪自抑畏盡
人之微孰敢造膝以弼予違外以溫恭通接羣志內以
文明辨其誣偽溫則可親明則可畏端良既進纖邪自

退

欲箴

火燎于原水決于川欲之敗德猶水火然故昔令王好
樂無荒蓋懼窮欲焚溺為傷凡欲之微則為身患大而
不過民斯塗炭易稱室欲書戒無逸願銘盤盂勿忘終
日

志箴

居安思危已治不有其難其慎惟明明后乃後佚王

驕盈急忽謂已有天命人莫我拂恣其攸好動不慮善
罔懲其侮以失黎獻湯不自用文王小心允迪休命茲
惟良箴

樂箴

罔淫于樂罔遊于逸禹益吁嗟所相規恤在商成湯不
邇聲色在周周公尤戒酒德秘殿燕閒萬機之餘時延
正士訪其嘉謨前言往行則有圖書宣其優笑而後為
娛

蜀丞相諸葛武侯畫讚

并序

寶元始年冬余監新定郡王人閔廷俊來錫時服廷俊以善畫待詔翰林因候俊于傳舍語及畫之名家俊曰某之藝於人物為工比內出古之名賢像于資善堂嘗摸得之唯肖余既竊慕蜀丞相武鄉侯之為人因請于俊願見其像俊褚中適攜焉以余好之篤遂以為遺時郡從事葉紆興于座曰君覩畫而愀然何歟曰有是夫盖有感焉者予獨念此公初耕南陽時抱膝長嘯自比

於管仲樂毅時人莫之許也惟崔州平徐庶元直謂為
信然夫士之抱器待用憂深而思遠以天下之事自負
而識之者常鮮及其風雲變化功名光大從而譽之不
已未乎又論者咸謂武侯為管蕭之亞匹茲尤非知言
者彼夷吾從非其主已迷方復行險擇利更事讎敵不
能檢身以禮而僭濫敗度不能正君以道而權譎苟合
其器與行夫子卑之蕭文終起沛獄吏素蘊初淺漢氏
始造用衆智力文終之業專在關中至其追淮陰舉平

陽密識公心真大人之事然與武鄉易地而處質勝其
文矣故余謂論者之非知言後之君子必有取乎爾始
武侯遇蜀主自夏口使孫車騎回與周公瑾破曹公軍
時年二十七後出武功五大原與司馬宣王對壘于渭
南卒于師時年五十四中間僅三十年規摹事業光映
千古噫大丈夫顧不當如是夫讚曰

孰以武鄉而比管蕭桓文之事孔門弗道文終刀筆託
驥之髦雄材清風凜猶相遼當卧隆中抱膝嘯吟方寸

萬里何念之深蓋懷功名日月其淫不有良友胡獲我心
將軍顧重拂劍為起折操之角斷權之臂堂堂西關莫之
敢指芒星三反還復箕尾出師之表八陣之圖天高日昭
匪滔匪渝永慕夫人撫心悲吁悲吁云何悼無崔徐

雪竇禪師真贊

重顯

本何從來今則非去不捨衆生示諸空聚諸漏已盡萬
法無住金剛妙身曷形繪素

補元子時化

余觀元子論化善其意然有未盡者為廣其說焉夫時
之化也有大焉者爾蓋朝廷化為市井郡邑化為傳舍
山澤化為府庫耒耜化為弓劍禮樂化為夷貊賞刑化
為果報恩義化為讎敵忠功化為害禍威福化為喜怒
仁讓化為詐偽

補浪翁觀化

元子浪翁觀化凡四說其辭悠悠不槩人事故述三篇云
火生於木木亡而後火明木生於土土刑而後木生土尅

水而水以土存火尅金而金以火成此有無相化之說

右有無相化

朝為商暮為周朝為公卿暮為俘隸朝為忠義暮為寇
逆此有化無之說

右有化無

起于畎畝而君天下起于釣築而宰天下起于寇逆而
忠義名此無化有之說

右無化有

舍人院試方畧舉人策問

國家自景德中與契丹氏平而夏人効職貢行四十年
無鄙上之事軍政戎備則未嘗懈他日夏寇畔援大入
高奴塞平涼之役師頻無功自爾選拔將率訓齊卒乘
繕治器械無日不講聽諸議者猶患率之才難士之未
整械之不精其何為然諸生皆被大臣薦上以付於有
司將以採其所蘊也其陳用將之道訓士之術飭械之
法以歷代最長之說為方今可施之宜詳著於篇得以

推驗復觀前史所評材雄以武侯匹於管蕭衛公擬論
於耿鄧功名之際其間近遠試為品藻用觀持論敏學
高識無不自盡

省試策題五首

第一首

問唐虞稽古建官惟百夏商官倍周而三百此言王官
也昔禹會塗山執玉帛者萬國蓋自九服之外至于蠻
荒庶邦附庸莫不咸集然諸侯各於其國猶有卿士陪

臣史胥徒隸今天下大小之縣比虞夏之所分封五
纔一至于遐方遠裔止用一吏理一邑而議者皆謂置
官煩於三代建為併省之策然又觀秦漢故事奏列郡
四十二漢郡國纔百數守尉之外長吏自辟掾佐分理
而足此復何道也試參詳之為悉利病

第二首

問周禮地官載師職以大都家邑之田為公卿大夫之
采地至于諸侯之國陪臣卿士各有封邑以奉祭祀兩

漢之後列侯繼世迺自隋唐以來王臣兼五等之封者始為虛名實無分土而諸郡內外官縣吏俸廩之外命給職分地解謂之職田此誠均惠仕進優其不足使全廉節者也近在位者或以不均啟幸為言既詔罷之矣復以經久之式歷更祖宗之世而仍舊貫者是必便於事使反初制雖朝廷之議利害必然之理其更推迹以要終效

第三首

問儒家者流講究歷代之故該貫百家之說以多聞博見為通者也然其祖述根於六藝幼學就傳即所誦習施於有政茲為理道故其本末討論應詳若夫易之為書人更三聖其分二篇何意所係十翼何名書何以斷自唐虞頌何以繫之商魯二戴之禮傳之何師三傳之學立於何代此經術之大略諸儒辨論之所嘗及也請為條敘以觀敏洽

第四首

問兵者武備之本騎者戎事之急古者乘馬之數出乎井賦之法周官六職掌於夏卿歷代著令備諸廩牧本朝之制則有司存質賈之平外通市乎夷狄孳遊之課內列坊于冀陝時方丁于累洽議者忽于遠思芻田賦於民耕圉人配於兵籍庠夷廩毀井堙木刊向發邊屯蒐補卒乘更索民蓄頗乏軍興昔宣王復校人之官美于周雅僖公修伯禽之政歌于魯頌朝廷治不忘備事思預防稍因舊程班舉牧政諸生治業之外必及時務

之要此之利害蓋亦聞諸何以使赤岸三千阜蕃於麟
德天閑十二騰逸於龍媒考之前編為陳遠策

第五首

問昔唐氏自天寶失馭大盜干紀肅代之際貨力殫屈
畿甸百姓至接穗以餉軍元和中嘗校天下兵農之籍
率以兩戶而資一卒而又諸侯專土不貢不享山澤莞
權之利未盡登于王府憲宗乘此疲弊而能戡夷寇梗
復張紀律烜揚威靈惟皇運之開基席五季之多難擒

諸道偽遂大一統爾時王土蓋狹國帑未充耆定戎功
兵力亦給比羌醜鴟義騷犯邊障出車戍守取贍大農
賦發幾何民告剝敝遠鑒唐室近觀國初校物力則往
虛而今盈計役費則此輕而彼重有餘不足胡為而然
得非有司失平準之權豪賈操奇贏之利者乎將使農
末並濟壅滯以通利用厚生九功時叙有望敏識為陳
長筭

武成王廟試舉人策問三道

第一道

問屬者天子幸加惠復古制聽卿大夫營立家廟方詔有司考定舊典夫廟之制雜見禮篇及歷代之書皆多士所嘗講也若其堂室之位祭享之儀田祿之差器服之用自前代沿革之法逮諸異同之論略為條著冀効諸朝

第二道

問羌醜背惠頻年騷邊朝廷務為綏懷不事窮討惟是

曠日之計要以足食為本比西鄙守臣有上營田之課者朝議善之下其法於邊而論者或曰既勤敷蓄當虞侵軼若虧禦備是資寇糧盖自漢氏以還世講屯田之事間有長策載于史牒諒惟該洽備嘗商榷自昔營田之制及諸功利之宜至于古法之可行于今今事之不便於古幸為條列上裨國論

第三道

問先儒有言自古有治人無治法盖文久則減事窮必

弊變而通之然後能成天下之務故為國之勢猶權衡
然損益重輕適平而已或謂改作非聖人之志變古亦
先賢所譏遵用故常足以為政惟諸髦俊通明治體且
謂事之循舊約而易守者為長將復理貴便時改而更
化者為得矢言此義用觀遠識

太廟祧僖祖議

臣等參議伏以天子七廟著於尚書春秋傳禮之王制
祭法禮器諸子之說歷代之議詳矣故昭穆所以序世

及之正禘祫所以極仁義之本三代以降惟漢晉唐以其統祚之長得及祧遷之議國家繼天而王列聖重光盛德在人必百世祀厚陵復土虞主還宮對越祖宗升祔有日同堂八室廟制已定僖祖當祧合於舊典請依太常禮院所奏委為允當

尚書考功覆謚議狀二首

故鎮海軍節度使夏公

伏准太常禮院謚議如前贈太尉夏公昔先帝以諸王

在邸公纔四歲童子給事左右及儲宮建至于踐阼周旋翼戴遂為親信臣車駕再北巡封祀行幸公無不從乃摠禁衛乃殿方面乃登宥密位居承弼體于忠恕不矜不懈謹厚恭恪用終無咎夫考行尊名先王所以立勸者勤勞畏慎公實有之奉常之論於議允哉謹議

故寧江軍節度使鄭公

贈某官鄭公昔先帝以儲后監國公繇材武被選服事羈勒六龍飛天雲從而上羽林龍虎歷典諸校上命糾

守士心懷附薦試臨郡乃大得民遂擁旄鉞揔率親衛
拱扈宸極祇勤勵翼奉身而退終節益休夫馭下以和
茲謂寬裕治衆而整戎之昭也曲臺節惠較閭則協謹
議

送古卞北遊序

天聖八年

昔六國時趙之憂在秦備在隣國李牧為趙將守北邊
顧獨以其邊民戰破匈奴降東遼滅澹林盡牧之世敵
馬不敢南下况舉其國之力又况用夫天下之力然自

楚漢相持不暇北略而冒頓始大為中國敵晉氏之微
小雅盡廢隋唐之際更為盛衰自石晉割我幽薊以自
濟於禍難而冀方之地乃戎夏共處國家用文德懷遠
以交好息民于今三紀天下安于太平民不知戰公卿
士人恥言兵事子常何哉獨留意於孫吳家也噫誠得
將如李牧輩朝廷能盡其用廟堂之上智者謀之復山
北之地雪中原百年之恥係呼韓邪之頸縻致闕下使
歲時貢賀如漢宣帝時子行觀之其易難也涼風暮秋

木葉霜脫礪長劒以自衛冒北風而徑去惟我知子天下奇士汗漫之伎無所施爾酒酣日下駕而將行聊歌一引以起其倦游之意云華夏無敵兮乃古其然中國大恥兮有石之遷顧瞻幽薊兮崆峒之英逝將去汝兮相從來庭太白宿兮箕尾宮旄頭北指兮塞垣空念頗牧之無所用兮吁嗟奈何感子征兮永歌

送柳澥序

澥自魏隨計來京師不利于春官將北轅以邁鬱鬱訪

僕謀曰澥即歸將卜所以為親之羞敢問予何往為可
僕觴而告之曰嘗聞河東先生昔守邢今侍御高公以
布衣謁見先生優禮焉先生以文章氣義蓋一時仕不
究其用天下賢士大夫莫不惜之矧自其門下出者耶
前此三年侍御領琴臺不敏嘗請見實辱解榻以待則
是侍御之愛才其與人博矣况子河東之猶子能以奇
文懿行繼其家聲而欲覲見賢公動之以誠意者適邢
可哉勉旃會宗酒行無辭僕亦從此東矣

送趙參序

聖上始親錄鄉老之書僕與晉人趙生參俱見遺于春
宗伯別去二年居無何邂逅於太昊氏之墟喜而飲諸
市酒酣趙子擊觥歎曰嗟乎使我獨不當從衡時得憑
軾結駟馳乎秦晉之郊取卿相猶拾地芥爾如在孔門
吾庶幾子貢言語之科於是僕請趙子持觴為酌滿以
讓之曰趙子且默無躁夫為國者孰不幸安而昌孰不
不幸危且亡居是邦也既不忍其人於他邦也則使其

人皆無罪而就死地君子兼濟之心何如哉若賜也為魯一出矛盾四國助田常無君之心不可謂之忠勸吳出兵教越襲其不備不可言乎信致齊之民為吳之魚肉不可稱夫仁欲善晉而使親魯則又誘吳之疲兵以成其偽不可語諸義是則子貢一出而忠信仁義索焉顧獨存一區區之魯雖曰墳墓之託不可不救於道不宏矣趙子君子藏器於身與時消息子前言過矣於是趙子喜其異聞也捧觴畢之翌日僕遂征淮西趙子西

走輦下逆旅蕭索秋風向高揮袂拂鞭各隨蓬轉思永
交好褚無瓊玖故尋醉論書以識行且以規趙子使重
其言也

送山人邢遁序

歲值青章魁枕虎首不敏薄遊淮甸間沂流且歸同舟
一人布裘襃袂虎眉而長鬣揖而與語辭韻琅琅徙容
請其所自來曰吾耕嵩陰採藥於天台石門樂其山水
留人之暇時言蓋於易公羊春秋甚深同載至梁王兔

園不敏遂留先生且前自恨未即得從為山中遊姑結
後期觴而歌送之曰嵩之盤吾耕一壥不羞素餐嵩之
麓吾棲一谷安於華屋燎災災兮勢非長惟自照之明
兮雖流螢之細而有餘光嗟予聞道之晚兮與俗回屈
沐先生之風兮愀焉自失非余親兮素髮班班從先生
役兮歸柴關

請誠上人就東京左街萬歲院講華嚴經疏

伏以大方廣佛華嚴經者佛為大千衆生說一乘道純

真境界超絕權假當念相應即成正覺故十會說法不離菩提之場刹那成佛無待僧祇之劫諸諦平等同法界性甚深廣大莫可思議非圓通會融安能宣揚此無盡藏海誠上人聞修有本行入勝流善財遍參漸進虛明之地普賢大願會歸悲志之門此處吉祥有衆延請盡亦示如來之知見成大事之因緣夫一切含靈下至微塵之細三世諸佛上窮多劫之先元明妙圓本同具足但以情生智隔所立照亡是致百千差殊一多揔別

上人以方便惠為人演說譬之指月亦同筏喻不取於相乃如寶語以是功德為大福田則毗盧遮那光明遍照矣

謝劉莘老寄玉堂集序

某在仁宗朝慶厯初知制誥時夏戎繹騷兵難連歲不解奉使謀帥多出西垣遷除更踐鮮得安其職者某白於朝請得專典詞命執政者亦欲見留故絲綸之地演潤獨多歷二年召入翰林充學士尋改御史中丞未幾

復以禁職充三司使久之免邦計得請遂還禁林後改

端明侍讀龍圖閣學士十易藩鎮英宗治平中復召充

學士承旨辭不得命又還內禁居玉堂東閣

翰林盛事
著玉堂東

閣謂之
承旨閣

自惟孤陋三入承明之廬暇日閱兩禁詞冊因

俾兩院史繙錄前後所當內外制告命令書詔及禁中

諸詞語類次為二十卷雖思致荒淺不足為文章風體

然國家典冊號令至於史牘所載亦有以美教化厚風

俗示勸戒者非徒為之空文而已也玉堂者太宗皇帝

神筆飛白大書玉堂之署四字揭於中楹備于翰林舊志故以命篇云

謝蘇子瞻寄樂全集序

某白承寄示荒文序引讀之汗顏內怵雖君子樂道人之善且以雅好愛忘其陋然虛飾已甚愧不自遑老夫性資疎曠不堪拘束幼知為學而不能勤于時山東士人若劉潛吳顥石延年韋不伐陳靖田度馬武十數人皆負豪傑之氣不得騁相與縱酒為高僕年少好奇論

與諸酒徒游故不得篤志於學也讀書每抽三兩策換
易讀之未嘗依卷帙徹一部故涉獵荒疎藝文謬悠僅
成舉業得科名遂以仕宦其所以自處亦與為學略同
凡所經述或率意或應用每有藁草投之篋中未嘗再
閱若再閱輒不如意自鄙惡之故積兩篋不曾有所改
竄熙寧中得南京留臺無事有一吏頗敏利亦稍知文
章體式因付兩篋令編次之便依篇目各成倫類亦不
曾親閱有書吏三數人抄錄成卷帙其間差錯脫漏悉

不曾校對改證前年子瞻觀止見索鄙拙欣然呈納因
而面告為刪除其繁冗芟夷其蕪穢十存三四聊以付
子孫而已今承盛製而乃刻畫嫫母必欲使為姝麗或
鬻珣珉於市妄自譽售市中莫顧有名識玉者為求善
價盛稱為奇寶衆或信或否既遇卞和二人皆以妄謬
見誚鬻珣珉者誚當其分矣為求善價人亦虛受其累
今公得無亦取虛偽之誚也孔文舉諸葛孔明前世之
高賢今以老夫為之擬倫賜也何敢望回唯有一節自

東髮至終其身不為世屈此有似孔文舉然若遇曹孟德亦必不若文舉之慙去而違之爾所示序引幸公深裁損之使有以自得於心又門生二字尤是過言早以一日之稱遂託忘年之契何門生之有必請削除各正其分其高文今復納上唯加亮察不勝愧悚愧悚眼病不能親札口占殊不盡意

宮師趙公圓覺經會贊

并序

國老趙公叔平積有善根宿殖衆德本注釋大方廣圓

覺經深究了義得古佛心匪徒言之亦允蹈之慈愍之
心不折生草故用浮圖夏禁召淨行僧十人潔除園廬
熏被道場因而講說新經至中元日經徹罷散樂全居
士張安道聞其風而悅之以倡贊曰諸相非相自性圓
是法非法自心覺自心自性自莊嚴婆伽婆佛光明藏
平等法會文殊等共證如來非幻性了知幻是虛空華
二十五輪坦無礙今日道場集清衆大方廣義重宣說
普願法界諸含靈共此無邊功德海

贈崆峒先生雜言

先生拄杖常掛一葫蘆

崆峒公何處來冠裾太穿敝路途苦漂泊葫蘆空向杖
頭挑裏許曾無一丸藥何處得錢日日醉醉卧塵泥有
何樂先生顧謂余吾鄉在雲壑壯歲去崆峒多年向衡
霍吾有盛服披烟霞吾有華堂指寥廓蘊抱兀何知嬉
游聊假託亂髮垂破巾十指出芒屨布袴結雙繩緼袍
縈斷索背上懶負琴身邊不將鶴藥即從來沒一丸杖
頭葫蘆漫挑著當日陝中曾遇人一九入手已吞却藻

川子而識金丹耶為而說厓略煉時日月取精華餌時
雷風相噴薄三光之氣通混冥五采九光動輝燦玄
龜沈伏入深淵赤龍騰擊上霄堦洞天忽到見瓊樓寶
藏從茲發金鑰再閏工夫不自勤已見塵寰如夢覺頃
來瞬息六十年山深水遠窮遐邇林泉在處即為家乘
興有時入城郭日飲五斗自有錢倒卧泥塵勝錦幄嗟
而泡影已老殘朽木偶人猶動作附陰逐景類蚊蚋爭
粒尋栖隨鷄雀不知名利是泥塵自謂翻身登碧落葫

蘆一九而自覓良田稼穡須蓄獲仙階鬼錄路非遙一
映光陰吹劒鏑洗却塵泥從我來若到我家殊不惡

貽王生略雜言

并序

嘉祐三年余居守南都故人孫元規謫官在符離一日
致其門生王略來見余元規書且道生左蜀人舉進士
下第薄人事棄業絕意名宦亦不復顧恤其家求有道
者與遊以長往山林幽深為志于後數往來睢陽甬上
其意謂余久留心於道術將有所謁也既知余無有所

得遂告別云往茅山就陶隱居積金嶺下結廬以煉丹
藥去後間有書來頗通煉丹消息向五七年不聞音問
疑其丹成遠遊矣近有老郎雍君至自華陽云嘗見生
山中猶守丹爐瘁矣余哀生志士也積功勤歲月久丹
已逾期必不成又憫其內亦無以恃者以其嘗親近余
意良厚為之慨歎余聞道也晚頃亦頗通還丹大指因
抒雜言數十句代書因雍君寄生以發其所蔽無使守
株空老巖谷若使陰魏諸公見吾此作定應相與三點

其願解顏而笑初謂大音之餘響已消空谷之傳不期遺燼之一星可復燎原之勢天之未喪斯術也固宜世有其人焉爾

天上大龍訣古仙留此說古仙說還丹秘易不秘難所以煉丹人傳疑不得真人人有丹經藥訣人難明藥若得明訣還丹終見了何故丹難造火訣難得妙火若得妙訣還丹須可成火藥雖已知鼎訣人得稀鼎若得真訣還丹成可期三訣明妙真事在人精意

人意若能精還丹成決易藥是陰陽水陰陽體本二
交媾性情親氤氲成一氣火是生殺權生殺權在手
手法得之心不可傳於口鼎是造化主如國有城郭
人民得所安禍難不能作魏公演古文直指藥本根
彭老金鑰匙火候著精微更有徐真人論鼎語較親
古仙說天一此是坎中寶要知天一法正與節符合
起數自星杓相將莫前却及至上下弦上下宛無偏
五行顛倒術少順常多逆會此逆順情五行露蹤跡

萬物榮又枯足見五行力即此是天機至神不可測
天機在眼前對眼如面壁待而心識通何曾隔蟬翼
霄壤信懸殊相通亦有路八十一程中但駕河車去
去去依亭候節節如潮信紅塵日以遠紫清日以近
大哉生化功到此無窮盡富貴人所欲功名衆爭趨
自有逍遙人閉關玩丹爐人見丹爐近咫尺逾萬里
人見丹爐小具體同天地天地合其象日月合其明
四時合其序神鬼合其靈是謂大還丹九轉龍虎精

功滿告太上金簡收姓名人生水泡浮流景隙駒急念
生久幽獨悵悵爐邊泣弃家二十年空谷守株坐何如
就妻兒醉飽隨時過生且鑠山齋海上更尋討問得三
訣明重去泥丹竈

樂全集卷三十四

欽定四庫全書

樂全集卷三十五

宋 張方平 撰

祭文

祭故贈天策府上將軍燕恭肅王文

為中書作

維慶厯四年歲次甲申三月癸亥朔二十八日庚寅具
位某謹以清酌庶羞之奠恭祭於故贈天策府上將軍
燕王之靈昔在太祖造我有宋實撥亂世而返諸正太
宗撫極始大一統寢昌而熾則八斯男於穆真皇光宅

萬寓路許邢潤逮於蘇華並建茅社為國親屏惟王最
幼最享多福愛於太宗友于真皇重於今朝尊貴莫二
沈識蘊而不發威望懾於四夷命也有涯今則已矣聖
懷感悼淺服逾時隆器重名舉極恤典靈輜即遠國門
既叛某等邁時休運忝列台司雖曠接於儀形固上均
於慘痛恭陳薄奠申訣幌帷伏惟尚饗

祭故夏國主文

內制

維慶歷八年歲次戊子月日皇帝遣朝散大夫尚書工

部郎中直史館輕車都尉賜紫金魚袋曹穎叔致祭於
故夏國主之靈惟靈保祚世家撫有民社光膺禮命重
處翰垣貢職惟時恭勤載懋宜昌而壽荷國之休訃告
奄聞震悼無已繼承有體俾統於舊封贈恤之儀式如
於彝典爰馳使駟臨赴奠楹知氣如存哀榮是享尚饗
故入內副都知贈振武軍節度使堂祭文

維慶厯五年歲次乙酉八月甲寅朔六日己未皇帝遣
禮賓使帶御器械勾當皇城司于德源致祭于故入內

副都知贈振武軍節度使某之靈輓帷卽遠泉隧無還
念其生平恪宣謹力致茲芳醑慰爾營魂

故入內副都知贈振武軍節度使墳所祭文

奄謝昌時邈歸長夜體焉則降魂無不之永恤舊勤爰
陳嘉奠

故入內副都知贈振武軍節度使堂攢祭文

惟爾久在左右不忘恭勤隙駒靡停壑舟遽失輅袞卽
遠泉隧其幽清樽芳醑以將追悼

祭資政范侍郎文

維皇祐四年歲次壬辰七月甲辰朔具官某謹以清酌
果羞之奠致祭於故資政殿學士戶部侍郎贈兵部尚
書范文正公之靈嗚呼孔氏之門四科高弟惟達者之
十子得聖人之一體猗嗟乎公德行則充文學純深政
事闕通風節是勉名教是踐玉氣千尋金精百鍊赤墀
清規正色讜辭引義忼慨主尊臣卑夏戎不虔文告弗
悛付公蕭斧詩書在邊公允文武威行士附革其鷄音

亂亦適沮復節還臺皇皇泰階縉紳謂言股肱良哉維
直方大熙帝之載古訓是式王猷亶邁惟日孜孜愛莫
助之時望去朝識者曰咨比釐南夏爰徙東社邁癘避
劇汝陰促駕彌留泗濱竟號車琴精氣歸天復其清純
死生去來於達奚哀渠渠大厦怛此棟摧公陪宰席嘗
僚右掖炳然絲綸賞有餘色濤江湯湯往襲遺芳見公
未興德音未忘念言薄祜遭家艱疚莫適匍匐殞涕如
溜平生素琴已矣知音寄衷一盃髣髴垂臨尚饗

祭蔡參政文

維寶元二年歲次己卯七月庚寅朔十五日甲辰具官
某謹遣右都押衙許思義以清酌庶羞之奠致祭於故
參政侍郎贈禮部尚書濟陽文忠公之靈嗚呼公乎以
公之德之仁而中年以歿世乎天之報施略茫昧乎太
夫人齒髮高矣喜懼侍養晚乃得子未及撫而名之而
公捨以長逝乎公既生而不以家事為意捐館之日柩
無所歸家無所寓不然孰知公之清節素志乎嗚呼公

乎以公之德之仁何負於天而至是乎公之事親如事
天以為盡天下之美不足以報也公之事君如事親以
為竭心力之勤不足以奉也公之待故舊朋友如待兄
弟義之盡也公之視四海之人至於一物之細如視赤
子愛之至也公之心如青天白日光明曠達華夏蠻貊
同仰之公之行如渾金璞玉精華溫潤無賢不肖同寶
之嗚呼邦家之務生民之故茲念茲憂愛莫公助如何
難諶云亡之遽某爰始羈微公實賞知己衣其寒復飽

其饑延譽於朝聞薦於帝再濫詔選皆公引提公亦類
舉非苟以私前年暮冬見公潁川姿神意氣和悅溫然
違別戀戀孰期終天單官江外萬山阻延不見袞帷歸
旒翩翩涕淚流膺下霑九泉公有慈親公有弱子於焉
展報其不有年嗚呼公乎庶幾鑒旃尚饗

祭舅氏翰林學士嵇公文

維皇祐二年歲次庚寅十一月甲申朔八日辛卯謹遣
家僕以清酌庶羞之奠致祭於故舅氏翰林學士譙國

公之靈某粵在童年早依外氏惟舅文行是親是師廣

平君之嚴明

外王母
宋氏

南陽君之慈懿

舅前夫
人滕氏

訓誨鞠育

遂偕賓興策名六科入游兩禁歷踐臺省周旋顯要舅

繇文館乃登掖垣十年京華聯步朝闥瞻言母黨之重

實兼僚友之歡休澣更過笑言莫逆漆園柱下楞伽淨

名相期逍遙之遊兩忘契會之際委勢利於塵滓遺生

死於幻泡夫物芒芒不屑顧已前年小子遘閔南徂倉

卒去國舅又卧疾不及執手折簡叙違永陽秣陵再周

歲籥豈謂此別遂成永訣前者七月猶得手書草札數
行蓋已扶病辭意悽愴異於常時老母閱之即為大戚
小子猶謂茲無憂者乃舅宿疾間年輒發叔平訃至竟
如母言承問駭怛殞心摧臆老母號絕痛不忍聞嗟嗟
蒼天孰主張是吉人君子胡不壽考長子先逝遺稚藐
然孤櫬東歸匍匐莫及念言思此悲來填膺戚丈信來
云有理命百日之內即安舊塋先公夫人南陽賢淑復
與愛子共此泉壤九原可作神所慰矣戚信仍說舅自

卧疾迨於順化晏然沉寂一念不動得首楞嚴本無去
來亦何所住幻身雖滅我又何悲寄懷此辭示同世諦
尚饗

祭紫微韓舍人文

維皇祐四年歲次壬辰六月一日甲戌具官某謹以清
酌果羞之薦致奠於亡友紫微韓君仲文之靈維夏臯
月曉魄隅出明發不寐悲纏心骨念母氏之劬勞復檀
衣於茲日晨有使來致君慰札發函號讀怪非手筆云

感外寒方偃諸室口占書辭意殊詳密我弗以憂誰不
有疾緘報章而未遣傳凶問於奄忽怛人事之無常何
變故之倉卒也嗚呼哀哉惟我與君義則友生情猶天
倫忘形莫逆寫照存真音適墳荒之和氣襲菡蘭之薰
在明道之癸酉始傾蓋於京輦洎寶元之庚辰並飛綏
於文苑欽才致之開敏挹風局之通簡景行業之英實
味辭義之腴雋何宴嬉之不同諒趨舍之無間會浹日
以驚疎朝異班而恨遠歲困數以南謫同江淮之往蹇

俄叨命於秣陵君來司兮漕輓及春物之未闌見畫艫
於津館揮醉袂以相屬覺遲景之遽短邈江山兮清曠
澹懷抱之攄展喜嘉召兮暮秋帳石城兮飲餞久相望
兮中流君之舟兮已緩策余馬以獨歸城鷓鴣噪兮落晚
恃年華之未徂奚離索之多歎亦孰謂乎夫君遂中天
於此旦嗚呼哀哉人倫賞裁嗟我不明謂君器業實時
之英必當機柄而立功名此蓋公議匪私交情甫慶掖
垣之擢方參法從之榮曾毫釐之未售矧靈府之從衡

摧鵬翼於順風，負驥御於修程。世大體兮多艱，天施化兮靡平。惟才彥之不可多得，余哀君兮乃為聖朝與蒼生。哭之慟兮寢門重，余憂兮崢嶸。指幻泡之起滅，彼真諦之論精。紛物我兮異同，亦達觀之齊冥。惟延促兮妄立，緬胡為兮殤彭。寄余誠於一酹，時無忽於友聲。尚饗。

祭楊侍郎文

維皇祐元年歲次己丑十一月庚寅朔七日丙申，端明殿學士右諫議大夫知江寧軍府事某謹遣府吏奉清

酌庶羞之奠致祭於工部侍郎楊公之靈惟公道德醇厚山高淵默才允文武好是正直振迹朝綏飛聲霜策遂簡帝心外為內翼殿撫方面景從宸極訓輯戎策藻繪衮職敷經邇英稽古之力戊子暮春公致為臣年猶未也蕭然幅巾老成去朝我心慘辛爰合常僚閨臺嘉賓供帳淨廬以祖清塵接膝晤言街鼓振振權利見規實書諸紳陽羨釣舟期從公遊

公即席賦詩留別錢客斷章云陽羨溪中有釣

舟淪胥出守願言不酬徒麾建康蠡瀆比疆區區未通

俄頃炎涼視公吉履謂斯覲齒天奚難遽遺杖几有
子而才構業必偉嵩高維嶽土厚如削遠即幽宅素
旌綽綽復命曰常收神冲漠屬叨藩寄阻從弔位念言
契濶濡膺隕涕吁嗟乎公歆茲一酌尚饗

祭張密學文

維皇祐四年歲次壬辰八月癸酉朔四日丙子具官某
謹以清酌果羞之奠致祭於故京東西路安撫使樞密
直學士給事中張公之靈在坤六二臣道之美曰直方

大維德之體公仕初艱實勤素履肅以直內有勁如矢
義以方外其平如砥守長郡邑忠恕愷悌承介臺省清
規遠惠陟降侍從周密莊厲幹輸餽邊總戎在鄙寬國
之憂急民之事知無不為於公之利聞無不革於政之
弊惟日不足竭精盡瘁竟虧冲嗇以遘瘡疹靡究志用
遽淪智氣比者秣陵嘗踵風軌帳輶津館徽音在耳洛
師汶上訊騰接置晤言未諧素車倏至苴杖在廬阻從
弔位慄慄盈衷寄茲一酌尚饗

江寧府祭蔣山莊武帝神文

維皇祐元年六月一日端明殿學士朝散大夫右諫議大夫知江寧軍府兼管内勸農使提舉宣歙等州軍兵甲公事輕車都尉賜紫金魚袋張某謹以清酌時果之奠敢告於蔣山莊武帝之神靈雨作沴浹旬未止民弗寧於厥居懼無以輸上經賦供神常事以至於饑且窮也某非才為之長吏慮政不敏以致咎罰謀於僚佐所以徵福皆曰祈雨而雨禱霽而霽庇祐茲土惟帝聰明

屬限詔條不得躬謁以請也謹差將仕郎試秘書省校書郎行上元縣張康侯以告帝尚降鑒矜此下民尚饗

祭真武靈應真君文

維皇祐元年六月一日具官某謹上啓真武靈應真君
某典守茲土既無惠政何以徼天之福下庇吏民粵惟
仲夏嘉穀既殖靈雨不止懼成災沴瞻言靈宇肇自前
朝區區一方久知依奉敢稽舊禮仰黷威神尚俾山川
無作霖潦垂祐黎庶歲以順成尚饗

祭謝蔣山莊武帝神文

維皇祐元年六月七日具官某謹遣上元縣尉張康侯
以清酌庶羞之奠敢告於蔣山莊武帝之神昔有吳氏
之開國於江左也封內之望實維此山茲土茲民獲免
於災沴札瘥之患惟帝之德近苦靈雨將害田稼故致
區區以伸虔禱伏蒙昭答雲收氛散庶幾農穡遂以順
成敢薦熟腥往謝靈貺尚饗

祈雨醮壇詞

成都府

臣聞惟天洪覆幹萬化之生成惟人至誠通上靈之鑒
格敢申悃悞仰蹟高明粵茲并絡之疆遐處一都之會
田穰有限生齒寔繁民勤稼績之功歲無水旱之沴顧
賦租之僅給猶衣食以不充矧非順成即致荒散比從
改歲迄此仲春三農作務之時九種播殖之候時暘過
度雨澤愆期精禱未孚衆情同恐臣忝膺朝寄長此吏
民內愧匪才不能稱職且懼政刑之謬上累陰陽之和
宜以微軀獨當陰譴所祈甘澍早及大田庶濟黔黎免

惟災害臣無任懇禱之至謹詞

謝告詞

維嘉祐六年歲次辛丑六月壬子朔某日具官臣某謹
稽首上啓伏念臣託質大鈞稟靈生物早棲心於道妙
方寄迹於宦游顧有鄉廬用存家屬向集繕完之役已
終築葺之功其間就方位之便宜犯日時之拘忌竊虞
陰譴積致於忤違謹按明科祇神於謝告伏願上清真
聖下土神明降鑒矜全垂慈保佑俾昌厥後以永獲安

臣無任懇禱之至謹詞

嶽祠祈雨祝文

應天府

維年月日具官某謹以清酌時果之奠謹上告於東嶽
天齊帝伏以自秋七月迄今立夏亢旱不雨風霾無時
麥初出穗穀未下種蟲蝗孽生癘疫薦作下民嗷嗷無
所寄命憂懼惶惑莫知攸訴謹自薰被致虔祠庭夫膚
寸之雲不崇朝而澤天下惟帝之德幸蒙恩憫甘雨時
降俾茲黔首免於災害敢不勉於善政以上對於靈心

尚饗

祈晴祝文

秦州

某叨被朝命守茲藩閫署事已將周歲未遑躬謁靈祠
麾符所繫非敢怠忽惟王聰直威烈西土之望生民之
命待歲順成風雨以時則無災害夏秋之交靈澍不已
頗傷稼穡懼致艱食長人不佞深自咎責爰擇吉日恭
伸享奠尚鑒衷悃同恤一方哀此黎蒸俾免荒札官私
上下當竭誠禮共薦時事以荅神貺

祭蔡資政文

維元豐二年歲次己未五月十四日辛巳宣徽南院使
光祿大夫檢校太傅充東太一宮使上柱國張某謹以
清酌庶羞之奠致祭於故資政殿學士諫議大夫蔡公
之靈惟公質有文武資長政事凡所踐歷必存稱紀理
財正辭曰信與義除暴戢姦令行禁止著勞南國宣威
西鄙區橐破散烽塵消弭公議曰能朝僉載建一節端
歸樞機是委股肱喜哉元首以起密策造膝遠猷當指

濶步功名謂不移跬如何大車債於平軌窮通險夷孰
主張是我姻我舊我鄉我里奄隔幽明緒言在耳芻靈
寓焉將此芳醑久要不忘尚有銘誄嗚呼哀哉尚饗

祭王龍圖文

維元祐元年歲次丙寅五月丁巳朔二十二日戊寅太
子太保致仕張某謹以清酌庶羞之奠致祭於故龍圖
閣直學士知應天府王公之靈先正文康仁朝樞宰有
顯事功國策收載公起世家學優而仕直哉維清風類

是似惟功之資信厚為質頗僻之萌不接心術故其立
朝克秉常德施於政事允蹈淳則天地之理見於簡易
君子之道本於愷悌陪京二年治用誠恕民悅無苛先
吝其去方謀借留言上未及忽驚鐘聲父老相泣雖未
上壽星紀六周乘其積善邈與天游有子克孝白華之
潔逝莫能從一號三絕我聞傷之爰作斯誄著其至性
以章於世嗚呼尚饗

祭滕龍圖文

維元祐五年歲次庚午十一月辛酉朔十五日乙亥太子太保致仕上柱國張某謹以清酌庶羞之奠致祭於故龍圖閣學士光祿大夫滕公之靈惟靈侑儻閣達逸羣絕倫始踐廣場衆推奇人洎登近著朝謂名臣神宗即昨訪落初政公在諫省靡言不聽獻納之益施於號令寘於西掖乃執邦憲召入禁林亦尹京甸一麾出守于蕃于宣悠悠江湖凜凜塞垣徙地淮海實便吳閭憩於國門易車而航解維有日親賓未還方歌而哭宿夕

之間世故無常變不旋日孰主張是於何致詰我念與
公義好為篤惠子知我潘楊載睦我老在廬遲公從容
舟次津亭總幃已空淮人來迎畫鷁相連今其歸矣丹
旄翩翩嗟我耄衰情禮多闕寫哀一酹以伸永訣嗚呼
哀哉尚饗

祭蔡資政文

維元豐二年歲次己未七月二十九日乙未宣徽南院
使光祿大夫檢校太傅太子少師致仕上柱國張某謹

以清酌庶羞之奠致祭於贈工部尚書蔡敏肅公之靈
惟公之才無適不宜惟公之志果於有為自初登仕鋒
穎已見江南陝右績用丕顯簡在帝心中樞是付實講
戎畧以承神武混夷震驚仇方是懲獨念之深疾入股
肱嗟我與公少也友生黨序之遊繼以姻盟我老家居
公病在床莫復笑語何殊他鄉命也有涯英魂豈昧平
生志業銘詩具載日吉時良爰即窀穸遣息一酌幽明
永隔嗚呼哀哉尚饗

祭趙少師文

維元豐六年歲次癸亥四月丙午朔十六日辛酉宣徽
南院使檢校太傅太子少師致仕上柱國張某謹以清
酌庶羞之奠致祭於鄉老贈太子太師趙公之靈嗚呼
仕顯王庭老歸鄉社我思故人今誰存者並游辭場麻衣
如雪接武重金同茲大耋得謝掩關相望一陌樽酒笑
言累經青白公病再期去年我病四旬往來亦足有省
公來視我欲興不能我往候公公莫能興忽聞鐘聲公

已脫屣非幻不滅何云去住倚戶而歌此事驚俗於行
一酹衆哭亦哭先塋拱木體魄則降如其知氣豈埋泉
壤嗚呼哀哉尚饗

祭王端明尚書文

惟公先正弼亮真宗從享於廟為時元功公承世家以
才自致施之有政中和敏惠有為有守時推器識廼登
諫垣補茲袞職四國於蕃四方於宣平涼常山至於太
原坤維巨屏浚郊神甸帥節守符中外更踐出處三朝

事功懋建公資樂易達生任真賓朋錫俎不虛佳辰脫
展世纏斷彫為樸富貴多忘爽如夢覺兩京相望晤游
面濶忽聞遺言乃云永訣公於自性示既有省凡此聚
散空花雲影人悲亦悲我何以異姻舊之私寄情一酌

陳州祭太皞廟祈雨文

惟帝乘震司春德施化育萬物資始迄就歲功此為舊
墟實存命祀今方東作旱氣作沴百穀草木仰待膏雨
久未滂洽田野揚塵伏冀慈鑒俯垂矜祐時降甘澤稼

穡順成凡厥含生皆蒙仁濟尚饗

陳州祭商高宗廟祈雨文

昔上帝賚王良弼乃得傳說爰立作相而命之曰若歲
大旱汝作霖雨惟說式克欽承用能復興商道故王盛
德享祀百世今歲可謂大旱矣說之光靈乘東維騎箕
尾而比之列星王尚畀說復作霖雨大濟生物迄成有
年區區下臣敢効誠請

祭女夫故河北路轉運判官殿中丞蔡天申文

維熙寧七年歲次甲寅月日外舅某官遣息某具清酌
庶羞之奠致祭於女夫故河北路轉運判官殿中丞蔡
郎之靈嗚呼我在滑臺聞子彥秀鄉黨世交遂成姻媾
往牧蜀都任子校書一上中第聲光煒如學問滋洽辭
章爾雅敏於從政有過人者朝廷爾才擢之不次京西
河北俾專使指此時尊甫密勿近輔棟蓐聯華刺車接
部驥髦未騁驚駘方整悵望修途空嗟倒景籍始通朝
年未強仕實勤其官以速彫瘁初歸庭闈寵光甚渥今

出都門素旌綽綽吉凶糾纏勢靡有定將如之何不推
之命慨余老矣繫爾之託而反爾哭事奚可度四子余
出總角相扶遣怠往酌且撫其孤尚饗

陳州祭唐贈太尉趙公文

韓


維熙寧七年九月丙申朔二十八日癸亥具官謹以清
酌庶羞之奠敢昭告於唐贈太尉趙公有唐之季大盜
移國封豕長蛇踐食區夏生民塗炭城邑丘墟公於爾
時獨保孤壘攻圍幾年浴血百戰陳之遺黎竟脫賊口

兄弟三人繼登將相並有功德著於此邦而其像貌晦
於閭閻邦人不知久不克享某祇膺朝命再來領藩惟
公忠烈能捍大患寫之繪素神氣凜然乃建祠堂式薦
時事夫封為上公祀為貴神春秋之義禮典攸著奉之
廟食永世無斁尚饗

南京祭喬太尉廟祈雨文

惟神生為上公歿而廟食墳墓子孫殆今千載一方昭
事神靈如在凡有祈請罔不貺答念茲境內夏秋以來

水潦蟲蝗災害已甚近又不雨復成亢旱秋成失望首
種未入人心惶惶相與憂懼惟神哀憫時降甘澤殄除
蝗孽粗以有年仰冀聰明鑒此虔切尚饗



樂全集卷三十五

欽定四庫全書

集部

樂全集卷三十六

詳校官庶吉士_臣龍廷槐

檢討_臣何思鈞覆勘

總校官中書_臣朱 鈐

校對官中書_臣吳 俊

謄錄監生_臣楊兆豐

欽定四庫全書

樂全集卷五十六

宋 張方平 撰

神道碑

故推誠保德宣忠亮節崇仁協恭守正翊戴功

臣開府儀同三司守太尉致仕上柱國許國

公食邑一萬八千四百戶食實封七千六百戶

贈太師中書令謚文靖呂公神道碑銘

并序

皇宋受命光宅天下唯上帝顧保世賚良弼在太宗朝

有若呂文穆公蒙正率循大卞父寧王家克左右亂四方以底綏大業聖上纘服有若元宰太尉許公寅亮一德謨明修輔答揚祖宗之猷訓以緝熙於光明此所以持盈保成重雍累洽隆無疆之基者也公諱夷簡字坦夫文穆公之從子太嶽之後流光源深大王父夢奇唐兵部侍郎北京副留守以文穆貴追贈太師王父龜祥以殿省丞守壽春有善政沒因家焉考蒙亨嘗舉進士禮部奏名處高等方從兄執政嫌不就廷試後選集吏

部銓得引對太皇碩判銓王旦曰某佳士奈何以蒙正
故抑之旦曰此其文學政事有過人者即授光祿寺丞
改丞大理無祿早世公登台司追錫命三代並至開府
儀同三司中書令兼尚書令封齊祁魏三國咸平三年
章聖始御便座閱郡國貢士公以進士擢第解褐絳州
推官再調鹽城監判官將漕以幹局聞就遷大理丞權
定鹽筴度署西溪大儲放利會詔舉六科以才識兼茂
試政事堂屬將封泰山或言非訪闕政時因例報罷出

倖通濠材譽曰洽章聖識其名濱城並河水羨溢為害
寇萊公鎮魏請擇守於朝上諭宰司而以公行到郡循
隄防究民利病平繇省賦拯諸墊昏暇日閱征簿見田
罇之筭曰先儒有言王道本於農此何名哉表請除之
朝廷推其法天下自是農器無征太尉王文正當國深
器重公時王沂公曾在西掖文正嘗從容問沂公頗知
呂濱州乎曰聞名舊矣太尉曰他日成天下之務者斯
人也君善交之後公竟與沂公同當鈞軸徙兩浙提點

刑獄時緣瑞符繕靈宮上所嚴嚮貴權督作外希風旨
趨副期會後徒斬材或殞林壑吏輒以亡命聞而囚其
孥公具條白採伐為緩械木浮河調夫挽送方冬水涸
暴宿河埭公請一切散遣須春流番兵更還陞覲面承
慰獎擢刑部員外郎知御史臺雜事賜五品服數治詔
獄聽訟事閱實明辯當比平恕天禧旱蝗祆民驚譁屢
奏讜言指陳變咎公之論事婉而正辯而裁通而易從
不崇空語以干浮譽故人主樂於聽受嘗臨諭曰卿言

朕自主勉毋悼害復因占對稱旨特寵金艾近姻除中丞換起居舍人領通進銀臺封駁從官小會必蒙特召後亦不得以為例也每上前目送注意殊渥內史缺丞相進名而不及公帝曰呂某固宜此選公適持金絮使臨湟命虛負以待復節除兵部員外郎知制誥俄授刑部郎中龍圖閣直學士知開封府都邑務劇尹正才難擊斷者雜中善良循恕者并容姦蠹公之為理雅得其術威而不猛寬而無犯機芒不施區索自破治政清淨

府庭肅然逮今言尹京之政公為吏師今上莅阼優除
右諫議大夫永定甫竈內璫徙筮山辭連冢司詔公馳
驛覆視初陵既復同軌如期朝廷曰能遂以給事中參
知政事自章聖愆豫希見大臣翼室宅宗房闔助治二
府機政稍復壅閼公時判禮儀事請親戶牖之聽以分
帷帟之重杞絕矯漏用周幾微綴衣移御即請罷天書
儀衛納靈文方中閣然日章其慮遠矣祐主登祔章獻
慕往本室器服欲如事生公執禮文竟循舊典東朝叅

決抗尊當守裁範儀物無溢等數事規諸萌務全王體
進貳六職歷小宗伯小司徒毗贊七年遂正宰席領景
靈宮使集賢殿大學士一心百慮知無不為推選名儒
增設講員敷經上前導以典學每奏事之間輒引經史
稱古昔以諭哲惠日新發於啟迪玉清災議止繕營因
表謝宮使加吏部侍郎昭文館大學士監修國史登冠
三階公自叅貳兼掌國策合三朝之載以緒成大典至
是史成凡預筆削率被遷賞公前事確讓特蒙褒許久

之拜中書侍郎兼兵部尚書復辭都兵章懿之即達也
獻后俾為蔽塗且母變朝夕公請褻事如禮司天探旨
撓以拘忌獻后遣謁者挾日官使公裁公執大義不可
奪卒制服發哭考吉日備宮仗葬近原以究恤典禁籞
春宴獻后命無廢會公固啓而罷輦幄額威龍德務晦
懿不待養弗言而毀得伸情禮繫公將順且念輔臨之
久而虞倖密之間規中造膝事為之慎自此至尊舉
息皆章惠躬涖簡用剛銳任之言責協規交警俾懣后

心欽承二宮周旋十年內無隙言外無異慮孝慈篤至
固由上聖之姿佐佑彌縫抑自嘉猷之助天聖保定公
實勤止禁城火領使庀作落成進右僕射兼門下侍郎
時二駕復新宮肆大眚恩覃內外特疇公勞而加異數
公請均同列懇讓不拜止以吏部尚書兼鸞臺獻后登
遐上念章惠擁翼之勤褒上崇名著之遺札公以漸不
可長亟白刊誥止奉保慶之冊以揭大明之照時王路
方正乾剛獨運攄發健粹始初清明公手疏七條以端

治本杜宣授止中書斷側門之貢絕刊章之弊天下聞
聽廓焉更新永底蒸民之生則惟我后之德褒司十稔
深懷抑畏頓首上前祈避重位制授武勝軍節度使同
中書門下平章事判陳州將行燕見願得上三年計帝
曰行矣半歲其還相余公之在朝也則聖人之心易然
而無天下之憂公之不在於朝也則聖人之心慊然若
無與屬其天下至於朝議塗說咸企公歸如期而召復
冠鈞衡修明治方綜覈名實自左右常任準人牧夫俊

又任官本於訓迪光天之下至於蠻貊之邦但見巍巍之尊如天之覆美利所及日用不知惟景祐之平康則變諧之績用若乃並侑三后著不祧之式以顯揚文武之列崇建中壺尊順成之體以嚴對宗廟之重其糾睦公族也則官之環尹以別庶姓勗之講學以納軌善其章叙庶工也則陞之類舉以合公論集之朝郎以嚴班制伸理誣枉若寇忠愍之比悉及昭恤紹續功舊如潘武惠而下咸加甄叙此又贊襄餘論推廣德澤一人大

較也若其沃心話言極深研幾慎密不出莫悉聞已
景祐二年拜右僕射冬至上享帝於陽丘封申國公三
年表六上納政手札譬止次春復五上天子重違沖旨
命以鎮安軍節度使檢校太師同平章事判許州在許
二年而夏戎叛公聞之曰嘻鷁羽翼成是必颺去吾恐
謀國者慮害不深事失機先必致朝廷旰食已而如公
言卒至繹擾天下被其勞故徙公鎮魏固河朔心公比
當衡每籌邊奏揣敵動靜效如在目及此過覲手詔問

策公備陳西北守禦利害朝議賴以適從至魏浚城洩
除器備審佼壯籍蒐補其缺番休訓肄聲懾戎境大河
之北長城岌然康定元年五月復召輔政悉仍舊秩騎
寇犯塞赤囊日至公慮屯戍之久生佗盜心於是始議
營北都城鎮寧以謹北門之閉募民兵增州防以重庶
邦之守三邊守宰悉從擇遣俾綏凋敝諸府裨校間為
召見使知感歎夜思而得旦請而行已而北人來渝平
山東饑多盜備預有素恃而無虞冬郊改封許國公特

拜司空堅謝得允上惟文武之柄付倚在公倘計議不齊則事功難集下制兼判樞密院事公以二府之舊相均為重啓辭判總止兼使名上體愛人之心密講和我之畫數下恩旨切勅邊吏內保疆場遏其侵軼外推信義示之綏懷意在我守有餘賊勢自殆而後可與惟新矣後諸路防禦益嚴夏人通款納誓訖如公策慶厯二年季冬甲寅夙興將朝遂感風眩上憫公勞瘁至忘其身詔除司空平章軍國重事聽三五日一入累牘遞免

朝機邊畫就第咨訪勅就開寶浮圖設道會祝公延壽
御府出萬金藥上剪髭和七以賜至有移疾朕躬之諭
遂再辭位中旨斷表三年三月召見延和殿俾騎及殿
扉以不良行顧內侍與以前固辭更給扶命無拜面謝
衰篤慈衷惻然冊拜司徒猶監史閣軍國大事尋致軍
國之議頻表請老乃以太尉致仕朝朔望班等丞相使
璫密札軫問無虛月公世葬鄭原既得謝如鄭展墓郡
以疾聞詔使馳餉藥奩而已不及春秋六十六薨問至

輔臣方奏事上哭發聲謂左右曰乃心國家而任大事如呂某者可復得乎病不就訣歿不臨酹吾恨何既哉感悼不已為制服苑中哭之甚哀不視朝三日贈太師中書令禮官考行謚曰文靖比葬內密四致奠賻賜累千葬日復廢朝有以見大君元臣感通契會同德一體恩榮始終之極致者矣其配秦國夫人扶風馬氏太子少保忠肅公亮之女婦體順而正母道慈以嚴公在許昌夫人以歿及鄭展墓也且將葬夫人卜有日矣而公

薨即以慶厯四年十一月壬申祔於新鄭陪先兆君子
以為知命七子公綽兵部員外郎史館修撰公弼度支
員外郎三司鹽鐵判官公著公孺並太常博士操行器
識儒學吏用維其似之必復大顯公餽贈右贊善大夫
餘早夭二女長適司封郎中雍文正公子也次不育公
性莊重有儀矩望之毅然而姿宇渾厚即之溫如而神
采英發才全道周用無常器踐歷臺閣綢繆廊廟一語
一言莫不留為故事有猷有為莫不著為令典不潔名

不矜勞敢任天下之怨不敢有天下之德至於風郡國
建學校以廣教育之本循貢舉張六科以大招延之路
志在得士為邦家基推賢援能彙征於朝有自常參同
時宰延人物藻鑒賞別精裁其品題初若未盡者已而
果然善合羣慮考用衆長樂道人善而忘嫌惡雖待微
者若亡貴賤之間以延盡下情其接僚友周而不比寬
而有辨其事上直而無拂順而能守其殿邦撫民條教
明使人便安而下不敢犯其在朝位若不勝其恭者退

而燕居恂恂如也與季氏宗簡尤為友愛休暇相對談
名理之蹟不及公家之事而又敏學多聞精識強記殫
簡冊而備究經耳目者不忘屬辭雄贍長於理道朝廷
典冊多出公手至於文史之學名法之書當世所行率
公考正非夫命世之稟生人之傑安能德言並立功名
兼劭如此其章烜也宗簡惟古之君子論譔其前人之
美以明著於後世禮之大者故推諸孤之志舉烝彝景
鐘之義以請於上有命史臣俾敷揚其休烈康許公抑

所以表其子孫也銘曰天監有宋世祚明德能哲而惠
以熙衮職考慎厥相用康保民式克欽承相惟其人
其人維何文武許公實經大猷股肱王躬帝視公視帝
聽公聽有翼有為訐謨賦命恭默未言弼諧二尊如權
如衡如麓如壘嚮明專治啟發健粹秉國之平遵王之
義百揆四岳庶政惟和六府三事九功可歌于蕃許昌
孰尸鼎鉉以速寇戎丕艱廟筭公體慈旨請寬叛刑勅
邊謹守戎卒來庭三冠泰階再擁方鉞忠勞則多恩禮

亦絕曰師曰公名器之隆於申於許山川之封二十三年盡瘁王室納政於上請老以佚臨雍未拜焚園言歸古有知命公乎庶幾訃奏來聞上哭之慟蓋隱家邦推此隆棟爰命史臣纂揚丕績陵谷有遷音徽無數

大宋故推誠保德崇仁守正翊戴功臣開府儀同三司太子太傅致仕上柱國隴西郡開國公食邑八千一百戶食實封二千四百戶贈司空侍

中謚文定李公神道碑銘

并序

慶歷七年冬十一月壬子元老太子太傅致仕隴西公
薨於京師有司以聞上惟先帝察公忠厚任大節而屬
之以政傳導諸郎顧託之意甚重又惟公德義之益弼
亮之勤隱恫之深為廢朝遣內司賓臨奠於位賜恤異
於他公故事祔以司空侍中章紱太常準功行易名文
定越庚午輓帷就引內使典喪以返濮上越明年閏正
月丙午葬我文定公於鄆城縣之鄆侯鄉越三月申命
史臣謨揚休烈表之神隧蓋恩禮始終備已按牒公諱

迪字復古先世自趙徙燕大王父在欽以武材仕范陽軍逮唐季之難渡河樂濩之風土營家老焉遂徙名數為衛人以公貴贈太師王父令洵有知略初粵人間湖湘之亂盜取郴連周保權歸朝公為桂陽監使建策復二州逮潘尹弔伐師竟道連以絕嶺俘劉鋹終庫部員外郎三司戶部判官贈太師中書令考護明經術名法以御史推直使案蜀獄歸節因言陝部多留繫連連糾紛太皇為遣傳理出之召對苑中問蜀故中意賜朱紱

終國子博士知德州贈太師尚書令蔡國公曾王妣潘氏王妣楊氏白氏妣邊氏繼母劉氏追封魯韓燕陳魏五國太夫人公學通古今深博有大度初從河東柳先生游每覽公文章未嘗不稱善語門人張景高弁曰復古乎輔相器也且陶冶生輩矣賓興至都士皆目屬之禮部奏公第居下及廷對天子擢居第一召見容止嚴重姿表甚偉釋褐除將作監丞通判徐州兗州召試翰林遷著作郎直史館入謝加緋魚尋充鹽鐵判官屬議

東巡命二輔臣聯判秦寧經置封事以公貳之公始倖
充嘗言萊蕪冶廢不鼓第繇民輸鐵課凡高貲家率以
冶敗至沒入田產械繫孤嫠請罷冶賦大農張空簿計
文不改公議格及是慙為魯人請勒封肆青竟命除之
稍遷右司諫徙知鄆州召糾都獄改右史江淮饑甚朝
廷憂之授公安撫使俾以便宜從事公到部督吏課徹
徭賦通關市散利已責賑廩勸分勞徠安集所以救荒
之術甚設雖窮鄉知上恩意之及故年雖大殺民罔蕩

析牢無縲繫野無斂敷復命遷宰士邁銅鹽錫服三品
未幾擢掌誥命車駕祠瀨鄉陞亳為集慶軍以公領州
事譙境蒙幸復除公為均節其嘗預調役者加優焉故
禮成旋蹕譙民忘勞郡介京東西淮甸之交逋慝之衢
地有盜久橫或晝操仗入城邑陳蔡潁壽皆警縣鄉蒐
閱至出庫甲捕擊久之公謝還禁兵緩追罷購盜益自
寬微得其區橐陰簡驍士農商服而匿諸蒙館盜相翔
稍集掩格殲焉為正封圻疏溝瀆屢見善祥而歲大穰

代歸章聖以治毫之政勞勉久之公頓首謝會邈川犯
秦隴邊遽相及召對長春殿上曰雍闕中根柢卿有方
面才吾靳君重鎮撫之即以諫議大夫集賢院學士知
永興軍府陞辭上慰諭且召君無憚行也尋除本道都
轉運使詔赴秦庭按邊馳度隴行諸屯拊循吏士謀離
種豪以解羌謀繕築堡障守杜要害因與曹瑋圖上方
略未幾果召還禁林充學士特蒙眷禮上欲時見公俾
領審刑每奏決讞輒見止訪以機政嘗出沐內璫亟召

對於側門語及洮戎曰吾屬曹瑋秦州謂足辦緩急比緣羌變須濟師師未出請上郡章殆難以持重君其為吾謀帥公徐對曰騎寇剽悍略從諸小種勢甚張即入塞而秦州嬰城以守何以攝戎狄戰則兵不足瑋所以數告也瑋沈勇有謀威信著扞邊擒敵無易瑋者時方議崇上帝徽號上意難於出車默然公曰陛下嘉與海內臣庶行稀闊禮豈惡祠兵西郊乎上前席曰然則奈何公曰臣頃巡陝右凡伍符庫仗有細札小方今在芾

帶遂探以進西兵在掌上閱之嘉歎指筆牘授公具疏
諸戍卒乘度留防守之脩命樞府悉發會秦塞下顧謂
公曰今日復見頗牧在吾禁中矣師僅集告敵入境上
召問公瑋必克乎公曰克哉何以言之公曰兵法善戰
者致人不致於人羌數揚輕瑋言欲以怒瑋為誘兵鈔
秦鄙故見羸以致我羌雖知情得不勝其貪忿而卒自
致此為在瑋設中者克之必矣居數日中貴人馳召公
對於龍圖閣上迎謂公曰曹瑋大敗洮寇來獻戎捷公

何料之審也三都振旅羌以破壞故訖今三十年懾不敢動寶元中夏戎飽飛西陲驛騷而汧隴晏如關輔賴以為安寶章聖納公遠策而公任瑋之材折衝帷幄惠綏來世惟幾也故能成天下之務其功利溥哉天禧初旱蝗仍饑縣官經費不贍上坐內閣召公入語從容以三司所上計簿屬公番閱問財利何以取濟公曰放於利而為政導民抗敝非王度也蓋祖宗營內帑以備師旅凶札今羌狄歟懷邊亡大費出帑物以祓歲振百姓

之急盛德之舉也上曰善蓋以故事貸之公曰貸之為言虧廣大體不若遂賜之上喜為製寬財利論發內府金繒給度支使無加賦天下公因啓曰古之君人者必時視民之所勤民勤於力則功築罕勤於食則百事廢曩者上封詔郡國勿伐木除道宿頓傳郵以示恭儉已而祠汾歆亳有司侈設寢爽詔意繕靈館度殊庭斬父山林更費無藝恒暘羽孽迺天意所以申儆上悚然即禁採伐弛力役申戒四方省不急之度公之論事誠心

為質引義慷慨不崇空語故人主察其忠實虛懷嘉納
啓心造膝云補宏矣章聖嘗目公廊廟之器蓋知公之
深也尋以給事中參知政事諸闡肇建始初預聞及是
首除太子少傅手疏援先朝之故以讓遂兼賓客詔儲
后接賓客如師傅累牘遜免許從客禮焉賜之御篇元
良述六藝箴勉以輔導之意俄遷禮部侍郎冠忠愍公
由宮僚罷相詖辭譴衍公因燕見上頗問春坊事公曰
皇太子仁孝天縱睿問日躋羣臣佐翼實無過事或有

他語者臣請付御史辨之上改容慰罷焉時丞相缺公以參知政事獨當國謀猷變諧率循訓典總領衆職甚稱上意面命之相者數矣輒懇辭一日對滋福殿東序皇太子趨下稱謝曰蒙恩擢賓客為宰相因再拜上顧公其可復讓歟翼日制出以吏部侍郎兼太子少傅中書門下平章事賜賚皆異數公荷厚恩厲精索慮竭股肱之力知無不為而與朱崖丁謂相同秉政謂顓權不軌公意在綱紀國體論議不能平章聖不豫始議儲后

聽決謂立異以為太子總萬機即上躬良已殆難為朝廷禮公進曰撫軍監國漢唐以上疾止如初何愆於義由是資善決事國本固焉謂益橫其心間忠舊鉤黨攀援相入傷危不附至輒除吏不以聞公憤然語同列曰迪起布衣無左右之先上特達稱舉十年至宰相知竭誠奉公豈能阿權臣取容乎是日廷數謂執邪罔諉傾亂憲度頡威福諄大臣節因質責其狀乃并自劾姦臣竊國命而不能正請同免上深感悟歎公忠孝又稱

忠忠者數四遂與謂偕罷歸班既還第喜甚謂所親曰古之君子乎無求生以害仁今日吾所以報也屬上疾稍侵謂謀得施頃之復相是日除公戶部侍郎知鄆州真駕升遐貶公檢校尚書水部員外郎衡州團練副使志且殺公或說謂衡州之謫若士議何謂曰是庸何傷他日好事生傳衡州事不過云天下惜之而已時乾興元年三月也七月謂敗十二月復秘書監知舒州徙建康就改刑部侍郎徙兗海改兵部徙東秦又徙河南詔朝

京師公既對留五日而辭絕口不及舊事至洛師改尚書右丞徙三城就遷工部尚書耕籍之歲獻后上仙今上馳駟還公授資政殿學士圖舊共政遂復相章聖朝公雅見親重君臣之際無間然者毅然廟堂以身許國自謂臨大故責育弗能奪不結黨友取游說之助見加彊詎播越在外故莫為之地者精誠忠義貫於神明惟帝念茲復我弼直然天資剛勁秉心醇一雖歷危難艱阻僅全折而不撓正色益厲當軸處中用是亦弗能久

也景祐二年以刑部尚書資政殿大學士兼翰林侍讀
學士解機柄留侍經筵竟冒僂文除太常卿知高密尋
復秋官徙彭門又改地官徙充海堯不恭大入內地
公上疏願以屬老臣上曰是宜宜以煩耆德乎詔慰答
西師在野遼戎睚眦朝議藉公威重綏定河朔因授彰
信軍節旄判天雄軍吏民卒旅至於四夷皆知公兩朝
二十年舊相故不嚴而治疆場又寧復徙青社詔赴本
鎮過鄉展墓因慨然曰吾遭時至將相幸全節義不忝

先人盍歸來乎佚吾餘日也及曹南遂引年還君事疏
三上天子愍以職務留以除太子太傅致仕歸老濮上
放懷物外逍遙六年子東之以侍御史知雜奉安輿至
都使璫餉茗餌致上意存勞謂公不可強自力一見我
歟公謝衰疾竟弗入謂故吏曰吾篤老槁骸灰心聖君
念雅素儻加恩是吾為子孫見也張禹數視其兒猶市
攫爾啓手足之日無他恙時凝凜偃韞廬中顧左右曰
安得大幄冒天下之寒者乎神爽恬泊頽然委化享年

七十有七配時氏卒公約時子東之請諸朝追封永嘉
郡夫人繼室榮國夫人皇甫氏皆有德禮式憲宗姻三
子曰東之尚書工部郎中天章閣待制徽之度支員外
郎京西轉運使皆以才進著名迹稱賢士大夫不藉世
家幼輔之太常寺太祝六女長歸國子博士向絳次祠
部員外集賢校理張充次太常博士王端次未有行而
亡次歸大理評事陳襲古次在室諸孫曾孫十一人德
厚流光宜乎世濟其美者公孝於親友於昆季篤於朋

友不遷怒不逆詐計數回巧不接心術不苟進不潔退
功美不居患難不悔譽善不為諂嫉惡不為忌率由天
至非有勉者蘊之為行誼發之為事業在公之道蓋土
苴爾夫夸者死權矜者徇名逞禍機而導爭端聞公之
風薄斯知敦貪斯知約矣臣承學淺昧然粗聞春秋義
例矣大君有命敢誣信書銘曰侍中剛塞蘊涵純德發
為正色隱然柱石章聖惠哲察公忠烈可臨大節託之
喉舌遂付宰柄爰屬之政實受端命賓傳儲聖孽臣專

朝僻訛姦驕鉤連日囂我心鬱焦感憤中激志除邪偏
乃誠靖國以寧社稷綴衣出庭邁閔南征不遠湘衡顧
懷周京大人繼照圖舊廣孝顯揚輔導俄還廊廟迺平
泰階謨明弼諧若作梓材爾惟鹽梅師成羌落帝念遠
漠公在河朔敵崩厥角宣力中外文武盡瘁若時進退
道德益大攻奪為利太息為義處心云異於道同敝公
冲而用不激不聳率誠以動不勉伊中巖廊穆清軫念
老成俾揚頌聲式昭典刑

宋故推誠保德功臣宣徽南院使安武軍節度
使冀州管内觀察處置等使開府儀同三司檢
校太傅使持節冀州諸軍事冀州刺史兼御史
大夫鄜延路馬步軍都總管經略安撫使判延
州軍州事管内勸農使上柱國廣平郡開國公
食邑五千二百戶食實封一千六百戶贈太尉
謚曰康穆程公神道碑銘 并序

昔高陽氏命南正重司天北正黎司地其後為羲氏和

氏唐虞之際實紹其業至於夏商故重黎氏世序天地
在周程伯休甫其後也程氏世系蓋遠矣公之曾王父
諱守瓌仕周檢校尚書工部員外郎兼侍御史嘗更潁
川陽翟令樂其風土自汴之封丘徙居焉故今占籍陽
翟公諱戡字勝之先公以治春秋登仕故公初亦傳三
家之學既習通矣而委之曰君子惟多識前言往行以
蓄其德奚事一經遂博綜藝文天禧中楊文公億典禮
部貢舉時推文宗尤以藻鑒自任考試進士精甚見公

程文大器賞之遂為舉首及廷試亦在第四于時公之
名動天下釋褐涇州觀察推官代還遷秘書省著作佐
郎知齊州長清絳州翼城縣以愛利為政有聲俄改秘
書丞通判許州蘄州遷太常博士復通判虔州贛人巧
滑囂訟公治明審數辨冤獄發姦慝吏民畏服刑平政
清風績推最以尚書屯田員外郎徙知歸州轉都官員
外郎數月代還且甄用也途次襄陽聞父喪徒步而歸
服除召為侍御史寶元元年并代地大震壞城郭廬舍

民死傷者衆公以選為并忻等州安撫使入境以便宜從事宣布上之恩意諸失業不能自存者所以救賙安集施設周及人情大安還白利害稱旨所建皆見嘉納除三司度支判官遷兵部員外郎尋兼起居舍人知諫院鍾內艱時西鄙有釁朝廷多事公納忠開說補益居多時政賴之奪情俾領職公確辭得終禮制既免喪復還諫省尋以本官兼侍御史知臺雜事公之任言責司憲度切磨獻替以尊王體正國論未嘗齟齬及諸細也

故時議者重公有遠識惟帝心簡在殊深以例換三司
戶部副使不閱歲擢授天章閣待制陝西都轉運使遷
刑部郎中知渭州自羌戎為不義出車遣戍平涼當其
衝騎寇三大入殘夷及是始通款公蒐補卒乘繕完壁
櫓綏撫新附種落寧輯軍氣以振邑里始寧時樞府缺
員仁宗顧謂輔臣曰程某厚重可大任也有間公者以
為故事未有自待制擢二府者遂不成命拜樞密直學
士知益州屬貝州軍亂州將張得一失守抵罪公以嘗

任得一禡職移知鳳翔府易河中朝論皆謂坐累太重
踰月還舊頃之徙永興軍未幾遷左司郎中領瀛州高
陽關路馬步軍都總管安撫使甫至遷左諫議大夫祀
明堂覃慶遷給事中契丹使過高陽關稱疾請以紗巾
見公曰疾可無見見則以禮北使憚公嚴正乃具冠服
如儀仁宗聞而嘉之語曰程某有守差強人意還知審
官院他日帝從容諭時相曰昔孟知祥以後唐甲午歲
得蜀至本朝咸平中歲在甲午盜發益州西土大擾故蜀

父老識之來歲復在甲午蜀人以為恐其精擇可鎮靜者既而曰無易程某矣召對便殿親諭此指且曰為朕再行即召公執政公頓首曰事君者有命無避安敢以寵利居成功帝屬意良厚優除端明殿學士知益州到部彭州果有訛傳兵起者即捕斬之人心以定自孟昶歸朝守者務為安靜苟遠嫌訾至城堞毀圯莫敢增葺公曰城以保民者也故葺以除戎器戒不虞聚而莫保民何依焉遂議版築浚池隍今蜀城脩完公之力也明

年召除參知政事屢表遜避優詔敦促中人撫問者數
四在政府有告急變者稱得遺札於路關構甚密尹以
白於執政相顧未決公曰獨斬告者或曰何遽爾公曰
是情易得也尹試嘗訊之果告者工人舊出入此軍微
聞其中豪黠輩妄言頗連諸校因相與謀此官司莫敢
寬者必當按狀竟之因以圖賞利不竟亦無以反坐非
有同謀莫取證爾遂斬告者皆服公之發姦詐明且決
至和二年宰相文潞公復輔政公以通姻引避除尚書

禮部侍郎改樞密副使公才長於政事既歷二府練達
治要處心積慮期有以報特達之遇而時為樞密使者
與公情旨不相得邕州守將以賄聞而奏請增補峽洞
酋長且十餘上公持不從以為後必生事數爭辯帝前
因堅求解五年以吏部侍郎觀文殿學士翰林侍讀學
士領羣牧制置使罷然帝察公議每長有憂深思遠之
致內直公尋亦罷樞密使者拜公宣徽南院使檢校太
保廊延路馬步軍都總管經畧安撫使判延州秋大雨

水五龍川溢東西兩城將壞居民詢懼公登城肅禱水
波稍復迴還遂退衆謂公誠心若有所感然英宗踐祚
視秩帝傳是歲就錫命以安武軍節旄再判延州初夏
戎承襲尚幼沒臧訛龐四族顓國諒祚益習事患其逼
用李父磨也之謀誘訛龐等誅之初朝廷歲賜諒祚金
帛四族常分其半首領入貢輒貨易圖利故四族盛強
至是併其所部沒入財畜諒祚始擅其國氣驕意得作
為僭慢遂改元置官號數為干請公上言戎狄貪婪乃

其天性十求九獲猶懷觖望饑則噬人飽則颺去畜養之道宜以威克請專遣使責其僭妄朝廷因降詔詰問羌雖不悉稟命因是知為裁折公念西疆四道戍守千里士馬留屯坐空儲積持久之計必兼耕戰自古言邊備者必以其土人勁銳便馳射戰鬪習知山川險易其氣俗然也請籍邊戶擇取丁壯籍以為義勇廟堂議協自陝以西無慮得十六萬人更戍番休以農隙訓閱豐財足食安民保大武有七德公近之矣夏人自繼遷之

叛狃於狙詐之利至元昊尤多狡數故能獵服諸戎敢
為國患諒祚實輕譎易與者而朝論懲寶元慶厯之難
抑游說者多過其實羌每與契丹洮人相攻擊輒大點
集聲欲犯境公獨策其情不為之動而常勵諸將曰夫
兵事以嚴終可無用不可不戒也克勤小物備預益修
故時推公沈毅有方略得將帥體羌比年侵掠內屬蕃
部秦渭尤甚或言帥臣蔽匿不以實聞乃遣內瑄專領
諸路蕃部事公上言熟戶利於附漢甚憚役屬於羌我

不能庇內臣督領無益也且族帳星散而數犒饗呼召
期會更為煩擾不若委帥臣察其材勇捍邊有勞部衆
所服者間召赴闕天子親臨撫閱遷擢用之此羈縻之
術也上善其言以新命已行難遽改後竟以不便悉罷
或請置重兵長安為四路根本選大臣總節制詔公以
利害聞公對四路距雍遠或千里稟白待報豈及機會
責成四路雅合事權寇所侵軼相為救便從焉既而引
年謝事章十數上仁宗晚年賜詔曰卿年耆而德益隆

朕所加遇者未可以期順自高也公惶恐不敢辭及加旄鉞復中前請表又十上英宗特馳近侍賜手詔曰卿雖年高而精力克壯在廷歷年處置舉合機要頃邊多事正當為脩卿勿復更有請厚賜手封茗劑以將恩意公陳情懇至使者曰且有後命勿受辭公不獲已下拜受賜力疾視事賓佐共白公其嗇精神近醫藥厚自持府事僚吏請盡力公曰邊帥豈深居養疾者耶旦夕無少解疾益侵帝聞憫之詔還闕就輿上道軍民遠送郊

莫不號慟治平三年正月乙亥行次同州澄城縣索筆
牘欲自具遺奏草數字而薨享年七十外見大星殞于
寢堂而聞發哭先帝軫悼輟視朝遣中使弔撫厚賻其
家追祔太尉章紱太常考功閤合康穆二法以易名禮
也諸子奉禧帷以歸陽翟四月葬我康穆公於舊學鄉
先公之塋陽翟君後終濮州臨濮令祖思議隱居不仕
考諱坦國子博士以公貴追命三代普贈太師中書令
兼尚書令博士封成國公曾祖妣田氏祖妣劉氏妣王

氏秦魏陳三國太夫人公先娶謝氏追封陳留郡夫人
再娶李氏贈永昌縣君繼室以曹氏樞密使司空兼侍
中襄悼公利用之女也封新平郡夫人三子曰莊曰荀
尚書虞部員外郎曰萃內殿承制七女適供奉官郭承
則殿中丞崔良孺大理寺丞宋彥國虞部員外郎文恭祖
侍禁閣門祗候王咸允杭州節度掌書記孫賁濮州推官
李恂六孫高光祿寺丞充章雍太常寺太祝奇秘書省正
字公溫而莊寬而栗尤樂易喜談笑不為城府崖岸善與人

交其度豁如也薄於自奉食罕重味器服僅給而已嗜
讀書老而不倦雖在戎旅未嘗釋卷而首公勤職蓋天
資然易著乾之四德曰貞者事之幹貞固足以幹事理
財正辭禁民為非曰義若貞與義公實有焉用是出處
顯重且五十年忠勞在朝功利在民為當時偉人重德
盛矣僕康定中與公並命處諫垣至和末又代公為益
部以常同僚而從公之游也舊故知公之器蘊為詳銘
曰貞以幹事義以治民施於有政康穆其人文學發身

貢名第一惟其德業誠心為質疊疊諫垣實陳昌言法
冠糾違王體以尊遂服邇僚式虔亮采帝察其衷於心
簡在帝念戎難內儲蜀憂疇咨文武屬之懷柔公有常
德維邦之翰四方於宣先登於岸西園既平西州既寧
還躋二府參幹機衡無有作好無有比德剛亦不吐王
道正直高奴古塞實扼氏羌鎮守之重洛公巖廊蠹爾
夏戎奸黷憲度公厲銜策奔蹏入馭卒垂輯睦壁櫓繕
完拊循蒐閱軍氣桓桓議建民兵法古農戰保大經

久憂深思遠闕河晏然以公在邊兩朝眷賴弗遑引年
公不敢康將吏傷憫君恩見還大星已殞元戎於征麾
蘇啓行及歸里門翩翩素旌一氣同生大期共盡惟此
德名流徽不泯

大宋上都左街景德寺顯化禪師碑銘

我聞菩薩以方便智行於非道而作佛事以平等慈不
捨衆生而共世業雖逆順之殊化於解脫以同歸此惟
自證聖覺之可通固非常情思議之所及若顯化禪師

者蓋其人也歟初京城景德寺西塔七俱胝院有僧清
璩以誦經為業誦妙法蓮華經至五萬部尊勝大悲陀
羅尼各三百藏祥符中有布衣自云姓許壽春人造璩
作禮請受經梵相奇古目直視不瞬璩異之為受具戒
名之曰志言動止軒昂時獨語笑多行市里褰裳疾趨
或舉指畫空佇立良久間從屠酤游飲啗無所擇道俗
共目為狂僧璩謂其徒曰此聖人也佛法有賴矣衆未
之信久之士民稍稍斂矚有意欲為師具供曉輒至門

云來赴齋有欲施諸供具輒道名件索之溫人林仲方
自其家以摩衲來獻舟始及岸已來就取仁宗皇帝每
延入禁中徑登座結趺鉢畢遂出未嘗揖也王公士庶
召即赴然莫與交一言者或進紙筆默致所請揮翰如
風字體遒壯初不可曉後無不驗仁宗臨御久春秋漸
高深念繼承之重遣近侍至師所無他語惟展紙於前
侍者授筆須臾滿幅末云十三郎近侍以進不測何謂
後英宗皇帝入纂大統實濮安懿王第十三子也太宗

正守節請書師不顧迫之得潤州字未幾守節薨贈丹陽郡王曾在故相張文懿第見童妾謂為王家比丘尼他日以從女適故工部尚書王公素竟為尼僧義懷未出家師見之撫其背曰德山臨濟後住雪竇為衆說法祖道益明今南方宗旨盛傳多懷出也如是前記不可悉數普淨院施浴鳴鐘時方迎佛聞浴室中有人聲僧叔嚴往視乃師也語少時振衣遽去叔嚴追之院門尚闔故詣西塔欲驗其事守麗景門啓闕而出師安寢於

室復前語無遺海舶遇風濤且沒共見一僧操組引之
商人至都見師於市釋然引舟者也師曰非我汝為魚
矣有具齋饌而薦膾師并進之過廣濟河入菜市橋下
或躡而窺之見臨流而吐羣小鮮泳去南海有逸人潘
見衆莫可親近獨與士人趙崇善語崇云我昔見言公
於番禺由是遁宿命師故未嘗往番禺也崇亦與師偈
頌相從往還萬里間不決日師遺崇偈有太平山上寶
珠光之句又稱崇為赤溪君山人劉立常從崇得見其

偈問赤溪何也棠曰太平赤溪皆堯率內院山名爾棠者本曹人舉進士從官嶺外因攝潮州海陽簿見潘棄官從之後坐亡盛夏身不壞立後亦為僧名行忠住持傳法云如是異迹亦不可具載丞相呂許公問佛法大意師曰本來無一物一味摠成真僧問世有佛否師曰寺裏文殊或問師凡耶聖耶師舉手指曰我不在此住朝士長者四方者宿有所洛叩應聲率爾直示心要如是句義亦不可詳錄將示化作遺頌其旨不可曉也已

而曰我從無量劫來成就逝多國土分身揚化今南歸
矣語畢右脇而寂慶歷戊子十一月二十三日也有香
如蓮華久之不散仁宗遣內璫安奉真身於院之西殿
金書顯化禪師四字揭於前楹度侍者超覺為僧今真
淨上人也異日進士姜厚攀帷瞻禮額上有光如螢得
舍利一粒至是歲寢久四衆供事益嚴光靈益顯其江
東誌云唐法雲僧伽之儔侶歟嘗試論之蓋一相淨圓
人各具足自心見量非增減於太虛妙用無方故通融

於萬化但由根境隔闕藏識分別龜毛兔角空華海浪
習氣迷轉因物而遷至於本覺元明未嘗變失如漚生
滅水性無虧如雲去來日光不昧若知實無有法則為
諸佛現前證惟自心即是衆生度盡自然具清淨眼入
無碍智弗離當念超出祇劫之上不起於座周遍塵刹
之遠則師前記之明異迹之顯句義之妙故非智之所
可知識之所能識也太原王鞏少而樂聞道自其先君
素以真淨為善知識及是鞏編次其狀請以續諸隱聖

之後予閱其所紀皆衆所共聞見者非傳疑也故為略其煩細而擇其著明者實錄之而係以銘曰佛子云何號為顯化仁宗皇帝至心淨信以是名字留於世間復次佛子以正受力入於塵勞而作佛事於一切法得如實見轉輪聖王宰官士夫若善男子諸來問我我為方便示其本際如水中影如鑑中像如摩尼珠衆色自見無能所取非生住滅佛法流世力願廣大不見聲光孰警盲瞶師為法來故云有賴生民有欲著於好惡非激

而勸弗沮而懼我於世教不其有助聞名已謝幻身猶
全法施無盡金題爛然太平山上寶月還圓

宋故龍圖閣學士朝散大夫尚書工部侍郎提
舉南京鴻慶宮上柱國清河郡開國公食邑
三千八百戶食實封八百戶賜紫金魚袋傳

公神道碑銘并序

商書高宗夢得說爰立作相作說命三篇以為說築傳
巖之野故為傅氏蓋黃帝之子其得姓者十四人有受

國於傳邑者自為氏說其別也歷漢至唐常有達者公
諱某字命之世濟陰人今徙畿內考城曾祖祖值五代
亂離不仕考累贈開府儀同三司司空公幼孤事母孝
早有見於鄉里外祖樞密直學士燕公肅愛賞之守會
稽挈以行欲任以仕辭曰仕當以學請姑就學勵精服
勤遂成高業甫冠一上登進士第甲科釋褐以大理評
事知兗州仙源縣邑有發訟久不決又訟於州舊相李
文定公屬吏窮訊反坐發矯誣公至復自辨公使對者

原書其契不類情得遂伏辜文定聞而嘆曰吾不能使
枉者直而又為寡婦人罪吾甚愧之謝以粟帛盛薦公
之才於朝代還知撫州臨川縣江西劇邑名難治蓋南
楚之俗纖僇巧法吏舞文相俠為欺詆以多所證逮積
歲不竟困細弱公察其敝曰契之不明訟所由生乃立
條教告民凡田訟傳別約劑不具者一切不受其辭以
故豪猾不得逞吏束手囹圄屢空善良者安由是時輩
推其能政通判泗州淮濱大溢墊城壁朝廷聞水害馳

近璫臨役事程畚築慮庸六十萬渡淮徙土南山下道
回遠勞甚公循汴堤旁得高阜數里崎嶇不便於挽絳
請夷之載以回舟委城下省工大半詔書嘉獎泰州並
海歲苦風濤壞田廬又徙公海陵圖其患至則相地形
勢規築堤郭遂止漂淫之害民至於今賴之以選通判
大名府佐呂文靖公文靖夙聞其才委以府政俄而呂
公復相擢知宿州未幾提點江西刑獄徙益州路賜五
品服公自大理寺丞殿中丞太常博士尚書屯田都官

司封員外郎至是就遷工部郎中梓州路轉運使到部
值涓井夷人方擾郡請益甲公曰夷實獸心獸窮則搏
不有犯者奚自而來乘傳躬往廉問果縣豪吏侵擾諸
夷衆怨以叛按其罪流之嶺外告諭酋領即解散先是
夷人每秋成鬻粟於市市人相約率賤居之伺其乏輒
倍蓰以出常以是畜憾而生邊患公以官錢委官以時
斂發若常平之法夷人大悅自是境上少事慶厯初始
制課民植柳榆以為縣官殿最兩川地狹生齒繁無尺

寸曠土而吏恐負督民種藝不堪其擾公以聞罷之蜀人安業轉運使圭田在廣安舊事擇軍校之高貲者四輩掌其納輸貿遷取贏歲送鎡三千公命以市估鬻之送鎡三千後使何知至清吏也善而循之遂習為常其在兩川為民興利除害事良多召還改刑部陝西轉運使陞辭賜三品服初夏戎阻命犯延安蹂平涼暴師鄙上興費不贍夏文莊竦始建更幣以振邊置鑪商稅鑄重錢一準十既又就河東山澤遂及江南諸監並煆鐵

為錢轉以資闕右民怵於利則冶鎔盜鑄殺雜為巧死
罪積多法不能勝四民失業朝廷患之議所云掾公請
大泉一當三貨物始平民稱便建權鐵法姦鑄遂哀止
值關中饑春麥苗被野豪賈益閉匿穀騰躍而錢不出
操貨者賒貸邀重息公曰弛斂時也輕重權也發庫錢
三百萬緡以濟農民之交乏約輸麥於縣官軍儲以給
公私共利後間用其法以實邊穀西戍久嚴饋道難梗
州縣租賦自陝潼推移以輸塞上公按籍而歎曰此民

之所以困也為之經畫就所平糴自此田稅得輸本部先是募商人入粟於邊而受錢於都內凡三路歲或數十鉅萬時河朔告乏而朝廷艱於移用公聞之上言本道藏廩足給請罷都內所受錢以資河朔仁宗曰共國慮者當如是矣璽札褒飾召還糾察在京刑獄俄遷兵部三司戶部副使尋使契丹方還即命計事隴右時秦闕帥轉運使范祥攝職請城古渭州以拓疆場初蕃部訥支蘭羶有此地蘭羶與夏人有

仇力不能支因獻其地謀以自保祥不探其情遽陳利害以請朝廷易聽之遂興大役勒兵護築侵耗諸羌相率為叛夏戎亦集兵境上來理經界後帥張昇劾祥生事邀功請棄其地命公馳赴審事宜公至則以朝命宣告諸羌稍稍引散視古渭形勢深在戎落然業已營築請止為一寨立五堡以通行路朝議然之迄如所築復命除天章閣待制陝西都轉運使歲餘遷諫議大夫入判三班院流內銓陞龍圖閣直

學士充環慶路都總管知慶州到部番官皆見環州首
領蘇恩宿有疵負恩因見質執獨不至州將敦迫使就
道愈恐恃其衆偃蹇不奉命恩豪種有力量隣道聞之
嚴戍境上公乘其未動告諸邊吏恩始非惡意過疑懼
爾乃遣裨校單騎抵恩所諭以此意思號感聽命即自
歸歲餘徙涇原渭州舊事歲遣將佐領甲兵歷按諸戍
謂之巡犒所至侵擾民患苦之公止不遣公私便安民
為立祠今刻石存焉代還判太常兼知審官院遷給事

中承乏開封府丁內艱服除知審官院兼羣牧使復領
開封府會中山謀帥咽呢巨屏守邊已試之效無右公
者遷樞密直學士定州路都總管知定州未幾保州守
將操下嚴卒伍狃於姑息藉藉有怨言民懲慶厯之變
或以族行違難朝廷聞以為憂方議易守而公奏至具
條所以戒遏狀且言士驕而輒得所欲後母以制請勿
易守保無他虞時議推其持重有大體英皇由是器之
有大用意大農計邊儲內帑資以金帛則下本道貿易


緡錢平糴度支準其直率倍號曰省估民輸重困公按
實以聞遂罷省估止從在所時價河朔同被國惠除龍
圖閣學士召入知開封府今上踐祚遷工部侍郎莅事
審給府政大清間以疾倦於勞冗請得外補乃知兗州
復召還領三班判集賢院權判都省提舉司天監寢有
休息意請便鄉一藩乃除應天府又請閒曹以遂頤養
就領鴻慶宮遂歸曹南熙寧六年六月十三日考終於
私第享年七十一公性夷粹無城府而臨事有守操執

堅正天資長於政事而本之以明恕不為激察行吏下畏信簡而易從敏以有功故所踐歷必有可稱紀英宗簡在甚深訖不究其用然亦可謂厚行君子循良吏矣嘗買妾察其態度有異問之衣冠家女也又常嫁為士人妻公乃嘗識其父為之咨惻訪其家母已改適因為備行具以禮嫁之又為保薦其夫其篤於義多類此先娶王女早卒再娶柳氏華原郡君亦先公歿子六人楊國子博士宸太子中舍裳祕書省校書郎早卒衷裔

並秘書省正字女六人適太廟齋郎陳邈秀州推官張
行先左藏庫副使李昭用太子中舍李備太常寺太祝
呂希俊鄧州內鄉縣尉向紘孫男十一人詳陳州商水
令謫齊州歷城主簿評進士及第誦奉禮郎諫譴將作
監主簿說該詢誠並幼八年五月二十三日葬於考城
縣之西原陪先塋二夫人祔銘曰商書說命中興武丁
東維箕尾爰垂列星世有俊德秉有光靈前載相望文
武是經於赫大宋朝多髦彥能哲而惠舉此黎獻於灌

奉璋於宣作翰太平之基惟士之選有若傅公政事著名初試為邑即聞治聲凡所謀為迄觀厥成雖在周行已期公鄉賢人德業本於簡易易主乎仁簡近於義險阻異端烏可適治公知由斯故多愛利兩蜀遠方三秦劇部連駕督輸民庸實著渭扼西疆定雄北路事鄙近功體存遠馭持重不撓慮微亦精卒乘以肅獄市以清簡在英主迺還尹京素蘊未施濟河於行我初起家才名有煒歸杖於鄉以違世界風迹三朝隙光四紀履道

坦坦吉祥止止既具五福又餘積善宜爾子孫保茲蕃
衍必有令人克續以顯九泉可作尚襲黻冕



樂全集卷三十六